

道園學古錄

冊十

續通志卷一百一十五

七

道園學古錄卷之四十五

方外藁一

雍虞集伯生

銘

龍虎山道藏銘

道家以老子清靜之言爲宗老子本周藏室史故其流出於史官今
道家有藏室以藏書蓋有所因起矣漢之時去老子未遠其言最用
世然著於志者凡三十七家九百九十三篇而伊尹太公管仲之書
在焉不皆本於清靜也後世神仙祠禱凡方伎悉繫於道家其書概
謂之經蓋其相傳最尊者三洞三十六部凡萬百千篇世徒聞其名
而陶隱居真誥或著其目多云未傳於世者是也其可知者大抵出
於老子之後而老子至矣今其徒尊而藏之以室不亦宜乎龍虎山
者嗣漢天師居之其上清正一宮者道家之總會也宋慶元中沖靜
先生劉用光見知寧宗使有司新其宮而藏室之所謂經者皆粉黃
金爲泥書之後以宮火不存皇元大德三年有勅重建宮嗣漢天師
劉國公曰不可以重煩縣官也凡祠宇可爲者率其徒各以其力爲
之而君見張先生作藏室木石堅美締構雄麗規制益加於舊藏以
木爲匱置室中高若干尺內廣圍徑若干尺觚其隅爲八面面爲方

格以次受盛經之函刻木爲天人神仙地靈水官飛龍翥鳳之屬附麗其上皆塗以金中立鉅木貫之下施盤輪令可關以旋轉言象天運焉工未畢先生去世弟子孫景真成之而奉祠先生於藏室之北不忘其功也先生之師曰黃君復亨復亨之師黃君崇鼎至元中佐天師立道教多所畫諾亦有祠復亨嘗鑄大鍾起鍾樓施田益宮中先生名彥綱字叔紀閩人有文章其道行見翰林學士元公明善所撰碑文旣爲藏室亦買田食其衆以備修葺蓋遠計也復亨弟子李謹修從三十九代天師至京師來求銘其藏室銘曰

粵若太始虛皇之廷天真丈人象氣錄形結畫神丹出圖帝青散芒垂角振耀流霆昭明三光敷落九星縱橫自然非有使令變合萬億出物宣靈後聖有作取以爲經五千其文載之兼輅示我清靜遂我杳冥天根之門牝虛玄寧配天作極宰于化亭胤孳緒餘襲武承馨法言神方枚數以建要其宗歸如器在型上清有宮萬神攸停乃作瓊室俠列幽屏題囊篆茂刻曰雕玲龍韜括籍虎帶縈紕玉氣充達金耀晶熒陽衛雄毅陰官娉婷人不敢褻鬼不敢聽慎爾授受俾老復丁寶茲萬年合增帝齡下土小子集稽首述銘勒作真符後天不傾

大若巖廣福靈真宮銘

臨江道士聶立仁記大若巖曰大若巖者在温州永嘉縣北百八十里道書所書赤水山福地者也其山周迴五十里巖高十七丈深百四十尺廣倍之石環中虛容光東啓居者如在屋室大抵世言洞穴多在幽闇險絕必旁行仄入莫窮其所至篝火捫索乃頗有見以爲奇未有若是之明爽者也有石臺高數丈當其前若門屏然其北有東西兩溪合流道巖下匯爲龍潭面南出至縣其西溪相傳有赤水時出飲者壽考今山下多老人百十歲而赤水不常有也沿溪皆奇石稍可以物象名者若香爐石筍屏霞蓮花之屬凡數十處其不可名者至多也溪之源有兩瀑布皆垂百尺一曰谷際一曰傳巖尤奔怒者也晉永嘉中有傳隱逸王貞白者隱此洞其弟子朱孺子見白犬走枸杞叢下怪之掘得根若犬者煮食之身輕登石臺仙去故名其臺曰飛昇臺而枸杞至今豐茂異常產來遊者皆擷茹之傳王或云猶在時曾有人見之其后陶隱居著真誥於此故又名真誥巖又嘗煉丹留巖中夜晴時或望見光煜煜然云是丹光也唐時人間以水旱疾疫禱輒應咸通七年思王府參軍知永嘉監崔玄德始請于朝爲立祠度道士居之予田四百五十畝禁樵采一里宋宣和三年

建三清殿巖中賜名廣福靈真宮巖中風雨不及至今若新成者又有兩殿五祠一鍾樓皆在巖中道館廚庫在巖外慶元中道士婁王希皓知宮事皆修治之入國朝用温州道錄兼領故其徒散理別業宮廢不治大德四年曹淵龍始專居之出私錢募人二墾其山下隄其溪水除導其湮蕪得田數十畝益以己之私產悉以資宮中之用作齋堂治凡屋之當治者凡二十年而宮事備天子下璽書護之俾以其徒相傳勿敢有所易淵龍瑞安人其先累世仕故宋多至清顯故家凋喪乃從黃冠游至是兩被恩命提點宮事蓋盛事也其記如此淵龍嘗言曰上巖後山近一里得最高處木石深秀樵者至此每聞鍾磬聲相惑不敢動而去淵龍數至其處無所聞然尤奇勝也蜀郡虞集曰此子之玄應也爲著銘曰
巖中虛容作室門出震當離日承闕端鎮鉅石朱陶君去百年赤水隱原木葛綿綿曹淵龍修其宮學仙翁百靈受命斥物怪非有道者勿敢至矧敢壞勒以吾銘示千載

贊

佛母贊

佛念衆生如母憶子憐愛同情救度殊智淨梵宮中寶月華雲朝生

王子尊貴無倫

辛澄蓮花菩薩像

聖具大慈悲手執妙蓮華清淨無垢輪威照虛空界華與持華者無二亦無別我於不二門得見見在等爲一大事出常住於世間大人及我等是故敬信禮

維摩居士文殊像

城裏普薰香積飯室中同供妙天花清涼山上千年石猶結慈雲候翠華

龍眠華藏變相贊

龍眠居士宿慧通神觀華嚴法界觀毗盧妙相好靈智所現非幻作諸大知識以次來衣冠纓絡嚴飾具迺至諸天諸大天福德鬼神八部等威慈並承佛恩力各隨因地見形勢我思法雲頂中寶紫金光聚超衆地一毛孔中一切見半月滿月諸寶玉香雲鬘雲宮殿雲重重單複互含攝悲愍衆生故在世令我愚蒙得瞻仰願如童真法王子彈指開門入寶閣普現普讚盡未來與佛常住金剛定

瑞光塔院贊

大修行入本覺明了脚跟之下十日並照信功德母衆聖伴繞大寂

定光恆住佛表

達摩象贊

萬里東來言不契九年壁裏影爲雙等閒風信生蘆葉雲散青天月
滿江

昆沙門天王贊

介冑以居容擢斯赫持器不用填厭陰黯櫓槍在陲帷幄何思幽禱
顯符吁有神師

多聞天王贊

承佛願力以德爲威鎮于天門人龍弗違我自聞聞寧以多勝斂鎧
櫜戈默然天定

老子贊

上古聖神邈若羲黃民之識知休乎善忘巍巍其成皞皞其治猶龍
之嘆庶其在此禮儀三百威儀三千不有遺老吾何徵焉熙兮春臺
泊兮淵水孔德之容是謂物始

題陳希夷先生畫像贊

集嘗奉 詔祠華陰入雲臺觀進至張超谷拜先生遺象高遠淵冲
之風變化流通之妙猶可想見其彷彿也昔邵氏先天之學上溯其

源實自先生出天作斯文焉可誣也而世人以神仙求之殆因其所見而然歟錢塘隱者薛無塵得先生畫象草衣蓬跣蓋其終隱而無復當世之意者令集作贊集何足以知先生哉姑以所聞其粗者而言之其辭曰

風霆流形宇宙在手隱顯盡神而已弗有匠有代斲迺反無爲圖書之傳百世之師

二茅山四十五代宗師贊

第一代太師

仰瞻紫虛巍乎祝融飛霞成章流響振空日朗月輝玉質金容上承諸天啓我仙宗

第二代玄師

夷質虛閒靈傳感玄金宮流韻玉樹浮烟衆冥會言太帝錫召手傳道書筆精墨妙

第三代真師

夙緣應運世胄承社妙敷人文密贊神理塵爵外靡何間內脩玉宸之虛我懷真游

第四代宗師

紫微受書追奔兩儀人間如帑久留何爲委形虛壇合莫太始遺經
不忘保之有子

第五代宗師

天不愛道地不愛寶而彼尠薄莫之能保羣真手遺玉佩金璫知之
者希見之者昌

第六代宗師

維昔茅君兄升第及繼茲令蹤共保靈笈玉書所在萬神衛持道以
時興匪人得私

第七代宗師

緬游靈岳結友匡廬采秀黃華濯清素渠手握奇文足履輪輻簫管
虛林想見遺躅

第八代宗師

百穀之精結英中庭人以腹實我以虛寧全真玉光神文在世青童
復來吾得攸壑

第九代宗師

高臥白雲晨飡絳霞弟子如林著書滿家濯神九清騰耀二景與天
爲徒如日之炯

第十代宗師

翺翺鳳儀覽德不遲或隱或來景運有期質化神通不滯玄白百廿六歲唐仙宗伯

十一代宗師

絕世之資皆思友之仙緣有定敢縻以私茂松清泉亦復何須冥心合真樂出太虛

十二代宗師

至神合虛應物無迹強名坐忘銷爾塵質高風華林旭日丹臺蓬海無師歸求天台

十三代宗師

公私之辨至道名言徒說弗從頻煩主恩上經十三妙補遺闕忝著刻銘無愧稱絕

十四代宗師

神馮虛生至靈爲寶世塵紛揚獨靜以保時成返空我知其歸來無所欣去無所悲

十五代宗師

瞻日得道其知甚真柏庭之來桃源始春石龜五色首動尾應忽然

亡之妙極玄徵

十六代宗師

食味養形食氣養神鼎俎傷生忍而害仁我貴食母無假于外瞻儀有感豈識其會

十七代宗師

世之將危智者去之而彼真人慨然興悲深處巖洞流潤千里動植遂生風雨時至

十八代宗師

龍章鳳書可制劫運藏之貴虛保之貴定全體皆用誰執其方欲窮所入弟子亡羊

十九代宗師

旭日未升衆星粲如江南之都依我僊墟金印紫綬於我何有彼以爲貴來斯順受

二十代宗師

域中之大惟王與道我以虛神彼以位寶華陽之傳其書孔多以佐時功陰陽太和

二十一代宗師

朝遊寶林暮宿玉池微吟所激籟生涼颺玄圃之英濯濯其羽我翔
太清假爾飛舞

二十二代宗師

赫陽吐芒赤水騰光引以神鼎灌以靈漿千日道成潛躍自在盤桓
玉童縞衣玄帶

二十三代宗師

赤子童真宿智冥得凌虛有音履冰無迹有道之朝暖如中春執玉
振金爲時外臣

二十四代宗師

積金之陰其神孔威潛靈感符啓我仙扉兩扉闔開神生懸景丹光
在林人識餘鼎

二十五代宗師

玉華蕩空金英散香羣仙啓關受契紫皇神明之區有相成道襲真
給傳天地同老

二十六代宗師

秋空塵消春淵冰渙美哉僊儀皇明所贊徒贊其儀弗究其道臨終
之言帝王之要

二十七代宗師

古先聖真鍊質返始往來無方聚散無體我神甚真故與之遇外戶何人欲聞其語

二十八代宗師

土木之崇時息時興我行無爲彼夢有徵峨峨象帝玉質天粹臨化俱返孰執其契

二十九代宗師

神物之還雷電與俱青李何來報徵神墟發藥羣疾泉流林注以無盡施待有緣者

三十代宗師

太乙好生法容禱祠而所福禍則不敢私迷國當誅猶冀冥報玄獄之警亦輔名教

三十一代宗師

流星之光下而爲人斂精含輝忘言絕塵神丹之來道不苟授應物泊然是善玄守

三十二代宗師

仙學所能非人間書示假毫素何妨乘餘幾動於微我感以虛謂我

預知孰究玄樞

三十三代宗師

於皇阜陵躬勤孝理爰尙清靜詢于真士手製華巾俾卻冠塵疇克稱茲玉立長身

三十四代宗師

發書啓玄託易著明出入月道正不傾瑞露密降芝英自生白鶴起飛遂超太清

三十五代宗師

孰謂仙真遺世去之受職于天忠孝是司地道無成含章爲美俾揚皇風是用錫爾

三十六代宗師

千萬之一人保純德萬億之一純德之極純極而仙人化而遷父不拾遺仙許子爲

三十七代宗師

冠巾裳衣人飾其外我鑿以遊返質非怪桑林之憂釋以甘沛而不自神曰天所旤

三十八代宗師

得書石室古仙所留具釋隱言以鎮丹丘天門廣開羣真畢來匪夢
伊真萬方其新

三十九代宗師

偉平駕嚴誓遺世塵食地徇形實滯昇真處高非危守潔非介飛步
神京接軌玉海

四十代宗師

世運向微海將塵飛仙人知幾暫至遄歸山靈夜呼芝英晝映我保
玉書以請民命

四十一代宗師

道之所傳天且弗違孰睥睨之間以人爲苟可間者斯非其道告示
真士善守神保

四十二代宗師

華陽之洞壁以玄瓊千歲一開列見仙名仙之爲道有化無迹人窮
大傳我返真極

四十三代宗師

上清之宗世以賢受景運自新仙裔乃復噓和吸精保衛聖躬翼以
星斗導之雷風

四十四代宗師

養素以朴通真以誠內接玄洞外佐昇平蜚蝗伏藏年穀成遂少見其微已足名世

四十五代宗師

山岳昂藏湖海浩蕩玄微備至植宗華陽承光紫闕敷貺朱方九老都君錫爾寶章

張宗師畫像贊

維大宗師天錫耆年雲風恆從不以世遷翼翼小心赫赫盛服出入帝所長樂無極

吳宗師畫像贊

列仙之儒身爲道樞舒卷經綸綽乎有餘宇宙名言河海偉量冠服高明雲漢之上

道士小像贊

曖曖曾霄三素之雲超乎象外蔚然繽紛中有至真獨立不羣霞屬羽裾翼扶道君上朝紫闕手執玉文

序

送昌上人詩序